



Broj: 05/1-50-14-51-13/11

Sarajevo, 30.3.2011.

ZAPISNIK

13. sjednice Nezavisnog odbora kao nezavisnog tijela policijske strukture BiH

Sjednica je održana 30.3.2011., s početkom u 10 sati.

Sjednici su prisustvovali članovi Nezavisnog odbora: Žiko Krunić, Bakir Dautbašić, Mato Jozić, Dragan Savić, Ljubomir Kuravica, Viktor Dadić, Stanko Nuić, Enes Obralića i Zijad Kadić.

Sjednici je prisustvovala Alma Salkić-Mijić, koja je obavljala poslove sekretara Nezavisnog odbora.

Sjednicu je pratio Zoran Brkić iz Sektora za odnose s javnošću PSBiH.

Trinaestu sjednicu sazvaio je Žiko Krunić, predsjednik Nezavisnog odbora. Nakon što je konstatirao da postoji kvorum za punovažan rad, predsjednik je otvorio sjednicu. Nezavisni odbor jednoglasno je usvojio sljedeći

DNEVNI RED

1. Usvajanje Zapisnika 12. sjednice Nezavisnog odbora, održane 26.1.2011.;
2. Razmatranje informacija dostavljenih od policijskih agencija BiH u kontekstu inicijative za izmjenu člana 59. Zakona o policijskim službenicima BiH;
3. Tekuća pitanja
 - Zabilješka sa sastanka, održanog 23.2.2011., s komesarom Stefanom Fellerom, šefom Policijske misije EU u BiH.

Ad.1. Usvajanje Zapisnika 12. sjednice Nezavisnog odbora, održane 26.1.2011.

Predsjednik Odbora otvorio je raspravu o Zapisniku 12. sjednice Nezavisnog odbora, održane 26.1.2011.

S obzirom da nije bilo primjedbi, Zapisnik 12. sjednice usvojen je jednoglasno.

Ad.2. Razmatranje informacija dostavljenih od policijskih agencija BiH u kontekstu inicijative za izmjenu člana 59. Zakona o policijskim službenicima BiH

Predsjednik Nezavisnog odbora Žiko Krunić u uvodu o ovoj tački dnevnog reda istaknuo je da se Nezavisni odbor ovim pitanjem bavi duže vrijeme i da je na nekoliko sjednica vodio raspravu o tome. Naglasio je da je Nezavisni odbor, provodeći proceduru izbora rukovodilaca i zamjenika rukovodilaca policijskih agencija BiH, iz svoje nadležnosti uvidio potrebu izmjene člana 59. Zakona o policijskim službenicima BiH. Razlog zbog kojeg je Nezavisni odbor pokrenuo ovo pitanje jeste mali broj kandidata koji su se prijavili na konkurs, tačnije

njih 13 na šest pozicija. Napomenuo je da je Nezavisni odbor na jednoj od prošlih sjednica usvojio zaključak da se obrati svim policijskim agencijama BiH i ministarstvima unutrašnjih poslova na svim nivoima vlasti u BiH, sa zahtjevom da dostave podatke o broju sistematiziranih i broju popunjenih radnih mjesta za koja se traži čin glavnog i čin samostalnog inspektora, kao i o stručnoj spremi glavnih i samostalnih inspektora, kako bi imao informaciju o broju lica koja ispunjavaju uslov za rukovodioca policijskih agencija BiH. Naglasio je da su podatke dostavile sve agencije i sva ministarstva unutrašnjih poslova, te da su članovi Odbora u materijalu za ovu tačku dnevnog reda dobili jedan pregled iz kojeg se vide ti podaci.

Otvorio je raspravu o ovoj tački dnevnog reda.

U raspravi su učestvovali svi članovi Nezavisnog odbora.

Članovi Nezavisnog odbora saglasili su se da bi izmjena ovog člana mogla ići u dva pravca.

Prvi bi bio da se posebni uslov - posjedovanje čina glavnog inspektora i tri godine u tom činu - ukine, a da se propišu neki drugi uslovi u pogledu struke koju kandidat za rukovodioca policijske agencije BiH mora imati, određeni broj godina iskustva na određenim poslovima i slično. Na ovaj način bi se otvorila mogućnost i osobama koje nemaju čin, uz ispunjavanje drugih posebnih uslova, da konkurišu na te pozicije.

Drugi bi mogao biti da se posebni uslov - posjedovanje čina glavnog inspektora i tri godine u tom činu - zamijeni s posebnim uslovom posjedovanja čina samostalnog inspektora koji ispunjava uslove za glavnog inspektora. Na ovaj način bi se omogućilo većem broju kandidata da konkurišu, ali bi i dalje pozicije rukovodilaca policijskih agencija BiH bile rezervirane samo za osobe unutar policijske strukture.

Saglasili su se da je vrijeme da zaključe raspravu i da se o ovom pitanju na jednoj od narednih sjednica Nezavisni odbor izjasni. Nezavisni odbor kao nezavisno tijelo Parlamentarne skupštine BiH, prema poslovnici oba doma, formalno ne može biti predlagач izmjene zakona, ali kao tijelo koje je nadležno za provođenje postupka odabira kandidata na pozicije direktora i zamjenika direktora policijskih agencija BiH može podnijeti inicijativu i iznijeti svoje mišljenje o pitanju iz svoje nadležnosti. Svi članovi Nezavisnog odbora saglasili su se da je cilj rasprave o izmjeni člana 59. Zakona o policijskim službenicima BiH bio da se predloži rješenje koje bi omogućilo da se na ove pozicije može prijaviti veći broj kandidata, kako bi Nezavisni odbor izvršio selekciju i predložio najbolje kandidate ministru sigurnosti BiH.

Članovi Nezavisnog odbora usvojili su **zaključak** da se za narednu sjednicu pripremi prijedlog inicijative koju bi Nezavisni odbor uputio nadležnim tijelima i institucijama a u vezi sa izmjenom člana 59. Zakona o policijskim službenicima BiH.

Ad.3. Tekuća pitanja

- **Zabilješka sa sastanka, održanog 23.2.2011., s komesarom Stefanom Fellerom, šefom Policijske misije EU u BiH.**

Predsjednik Odbora je u uvodu o ovoj tački dnevnog reda naglasio da smatra da je sastanak sa Stefanom Fellerom bio konstruktivan i izuzetno koristan.

Članovi Nezavisnog odbora primili su k znanju Zabilješku sa sastanka, održanog 23.2.2011., s komesarom Stefanom Fellerom, šefom Policijske misije EU u BiH.

Predsjednik Odbora podsjetio je članove Odbora da je Planom rada za 2011. godinu predviđeno održavanje pojedinačnih sastanka s rukovodiocima i zamjenicima rukovodilaca policijskih agencija BiH s ciljem sagledavanja njihovog rada.

Usvojen je zaključak da se u aprilu organizira sastanak predsjednika i zamjenika predsjednika Nezavisnog odbora s direktorom i zamjenicima direktora Direkcije za koordinaciju policijskih tijela BiH, u sjedištu Direkcije.

Prvi zamjenik predsjednika Bakir Dautbašić informirao je članove Odbora da će Odbor uputiti zahtjev za korištenje TAIEX pomoći i to na način da će aplicirati za studijsko putovanje nekoj od zemalja Evropske unije koja ima odbor sa sličnim nadležnostima kao Nezavisni odbor.

Sjednica je završena u 11.35 sati.

Privremeni sekretar
Nezavisnog odbora
Alma Salkić-Mijić

Predsjednik
Nezavisnog odbora
Žiko Krunić